

Laax-Falera è la gronda surpraisa

Tir da gruppas chantunal

DA GION NUTEGN STGIER / ANR

■ **L'emprima da las duas prerundas dal tir da gruppas è a fin. La proxima runda decida tge societads da tir che sa qualifitgeschan per il final che ha lieu en trais emnas a Cuira. Suenter l'emprima runda èn cun ina excepziun las gruppas favoritas a la testa.** Cun il tir da gruppas ha la stagiun da tir en il Grischun er cumenzà per ils tiradurs che na tutgan, almain sin il palpiri, tar ils matscheurs. L'occurrentza è quella che atira bunamain il pli grond interess da tuts ils tirs, cun excepziun dal tir champester. L'emprima e segunda runda chantunala vegnan tratgas a chasa ed il final lura al Rossboden a Cuira. Tar quel vegnan eruidas las societads che daventan campiones grischunas e lura er quellas che sa qualifitgeschan per l'emprima da trais rundas naziunalas. Là cumenza tut da nov e cun in pau cletg èsi pussaivel da cuntanscher la proxima runda ubain er betg.

Sedrun-Tujetsch la meglra grappa sursilvana

En il champ A, cun l'arma da sport (arma da standard) èn sa participadas a l'emprima runda grischuna 39 gruppas. La gronda surpraisa è segir che la grappa favorita, quella da Favugn (vicecampionesa 2015) è suenter l'emprima runda «be» rangada sin il quart plaz. A la testa da la rangaziun è la grappa da Haldenstein e quai er grazia al resultat excellent da 196 puncts da *Toni Vogel*. Cun la grappa da Tavau e ses segund post è tranter las top trais gruppas ina da quellas che ha procurà per ina surpraisa. Nagina surpraisa è lura segir il segund plaz da la grappa da Cuira, ella che ha gudagnà il

final 2015. Da far 196 puncts da 100 pussaivels è er reussì a *Meinrad Monsch* da la grappa da Cuira e quai è in fitg bun resultat. Vogel e Monsch èn cun lur 196 puncts er ils dus tiradurs ch'èn a la testa da la rangaziun singula. Ina ferma emprima runda han er tratg ils tschintg tiradurs da la grappa da Sedrun-Tujetsch. Lur 946 puncts muntan il 5avel plaz ed uschia è Sedrun-Tujetsch intermediar la meglra grappa sursilvana en il champ A. Per il final grischun sa qualifitgeschan en quel champ 18 gruppas.

Trais gruppas cun 689 puncts

Ils tiradurs dal champ D sajettan lur program cun l'arma da militar e quai 15 culps sin la schiba da diesch. Er en quel-

la categoria appartegnan mintgamai tschintg tiradurs ad ina grappa. 91 gruppas èn sa participadas a l'emprima runda grischuna. Per la pli gronda surpraisa ha segir chaschunà la grappa da Laax-Falera cun esser suenter l'emprima runda davanti en la rangaziun intermediara. Ils tschintg tiradurs han tuts persvas e sajettà equilibrà ed a la fin scrit cun 691 puncts dus puncts dapli che ils tschintg tiradurs da Sent. Bunamain sensaziunale è il resultat da 146 puncts dad *Ueli Krebs*, el che ha fatg la basa per il success da la grappa da Sent cun sajettar sco emprim dals tschintg tiradurs. Cun quel resultat è Krebs er en la rangaziun singula ina classa per sasez. La grappa victura dal final 2015, quella da Tumeagl, ha er fatg 689

puncts e lura tants puncts ha er la grappa da Sumvitg tratg en l'emprima runda. En quel champ èn da la partida al final chantunal dals 4. da zercladur 2016 total 24 gruppas.

Resultats

Champ A, 300 m arma da sport

1. Haldenstein, 962, 2. Tavau, 956, 3. Cuira, 951, 4. Favugn, 950, 5. Sedrun, 946, 6. Poschiavo, 944, 7. Ruschein, 943, 8. Andeer, 942, 9. Puntraschigna, 941, 10. Laax-Falera, 941, 11. Castrisch, 940, 12. Degen, 940, 13. Sumvitg, 939, 14. Cuira, 938, 15. Alvra, 934.

Champ D, 300 m arma da militar

1. Laax-Falera, 691, 2. Sent, 689, 3. Tumeagl, 689, 4. Sumvitg, 689, 5. Tavau, 688, 6. Tumeastga, 688, 7. Castrisch, 686, 8. Bregaglia, 686, 9. Alvra, 683, 10. Duin, 683, 11. Versomi, 682, 12. Ruschein, 682, 13. Val, 681, 14. Rheinau, 680, 15. Cuira, 678.



L'emprima runda chantunala dal tir da gruppas è a fin e quai cun intginas surpraisas.